

PETRUQ Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí èq hpyùn gyùn é hui* râ matú le, haù Woi-nyí é lhoq sân-yúng nyi é muzó đông mai, Íwa Garai Gasâng é hî te sê tô é hpaqchyî mã cháng luí, hkyin yù huí é bang nghut é,

² Garai Gasâng èq hkyin htoq yù luí, mingkân é byùbìng dut bâng chyáng dang kyô kat lhê. Jeju eq nguóngón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhông é Yhumsíng Yesuq Hkrisduq é Yhângwa nghut sù Garai Gasang chyáng nghut nyí sháng gaq! Yhang gi, Yesuq Hkrisduq, shi é mai dum dui toq é hkyô đông, Yhâng é gyai shogyo nhikmyîn é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó,

⁴ nungmoq é matú mauhkông htoq má tô to byi bê nghut é, hkâ-nhám le, a hten a byoq é, agot a-ù

* **1:1** *Yhâng é suí èq hpyùn gyùn é hui gâ é gi, Yhâng é suí èq mara chí sân pyám byí é lé ga lhê.*

a dut é, a hpoî byuq é muì lé le wó nhang é nghut lhê.

⁵ Nungmoq gi, lumjínq kô é yanmai, ló htâng é ahkyínq má lhoq htoq shit râ rì rì nghut é hkyi yù hkyô jé shoq, Garaî é hpungwup a-tsâm èq upzúng é hui bang nghut akô.

⁶ Haû mù, nungmoq gi, ahkuî razup zo, wuîhke hkyô junghkang jungmó má yón hpuzô é hui kó râ nghut kôlhang, gyai yhang gabú nyi keq.

⁷ Wuîhke hkyô haú pé mai, nungmoq é lumjínq myit gi, jet é hkyô lé wó chyam htoq mù, myi mai jên yù kôlhang htên byoq sê é hîng htoq je gyaú luî, Yesuq Hkrisduq htoq shit é hkûn, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê.

⁸ Nungmoq gi, Yesuq lé a myang wú kôlhang, Yhang lé chyitdap bum akô; Ahkuî, nungmoq, Yhang lé a myàng kôlhang, Yhang lé lumjínq kô é nghut mù, a ung htoq taî é eq hpungwup bo é gabú hkyô gi, nungmoq chyáng byínq jup nyi ri.

⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjínq myit é akyû lé wó yu nyi kô é nghut ri.

¹⁰ Hkyi yù hkyô haû eq séng luî, nungmoq chyáng jé bê nghut é jeju hkyô lé taî é myiqhtoî pé gi, gyai yhang sidiq myit èq jí jí chyun chyun ho gon wú bekô nghut ri.

¹¹ Yhangmoq gi, Hkrisduq wuîhke jamjau hui luî, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taî é hkûn, hkâ-nhám nghut râ eq hkasû é u má nghut râ hkyô lé ho gôn wú bekô nghut ri.

12 Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lhang gi, haú hkyô pé lé gyai wú nau bum akô nghut ri.

Chyoiyúng Nyí Râ Hkyô

13 Haú mù luí, zui saí râ matú nungmoq é i-myt lé hen to keq; yhumsing gùng yhumsing hkang nyí keq; Yesuq Hkrisduq htoq shit é hkûn, nungmoq lé byí râ nghut é jeju lé, hkyak za myit myoqbyu nyí keq.

14 Jìno gyô é zoshâng wuì su, myoq a bóng shí é pyat má nungmoq nyí tô é hkûn, nungmoq é agè ashop ô naú hkyô lé a châng kut é za,

15 haú nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyí keq.

16 Hkâsu mù gâ le, "Ngò gi, chyoiyúng Sû nghut é yanmai, nungmoq le chyoiyúng nyí keq." ☆ ga kâ tô ri.

17 Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbìng dông shí má nyí é u lé, Garai lé gyuq hkunggâ é myit mai asak duì keq.

18 Hkâsu mù gâ le, nungmoq gi, nungmoq é íchyí îwâ pé chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za,

☆ 1:16 Nhung 11:44-45; 19:2; 20:7

19 gumjup é eq mara a bo é sauzo nghut sù, Hkrisduq é hpaû dik é suî eq sheq hkyi yù huî é ru nghut é lé, nungmoq sê lhê.

20 Yhang gi, mau htoq xâng hkun mai hkyin yu é hui bê nghut kôhang, jìhtûm ahkyíng shí pé má sheq, nungmoq é matú htoq shit nhang é hui bê nghut ri.

21 Yhang lé, shi é mai lhoq dui toq yû mù, hpungwup shing kang bò nhang é Garai Gasang lé, nungmoq gi, Hkrisduq dông mai lumjíng kô é nghut luî, nungmoq é lumjíng myit eq myit myoqbyù hkyô gi, Garai Gasâng chyáng nghut nyî bekô nghut ri.

22 Ahkuî kúm, nungmoq gi, haû tengmán hkyô lé châng é dông mai, yhumsing gùng yhumsing lhoq sân-yúng yû bekô nghut mù, nungmoq é gumang wuî lé, lhumsuz é dông chyitdap bekô nghut luî, myit nhiklum mai, rayuq eq rayuq gyai yhang chyitdap lhum keq.

23 Hkâsu mù gâ le, nungmoq gi, htên byoq sê é amyui mai dum hkû huî é a nghut é za, Garai Gasâng é, rû dui nyi é eq ru gíng nyi é mungdang dông, htên byoq a sê é amyui mai dum hku é hui bang ru nghut lhê.

24 Hkâsu mù gâ le,
"Byù lhunglhang bang gi, wàhu mhan eq pung ri, yhangmoq banshoq bâng é hpungwup shing kang gi, yò mâ é banbó pé eq pung ri; wàhu mhan gi, nyhuî kyuq byuq luî, banbó pé gi, yoq gyó byuq lhê;

25 nghut kôhang, haû Yhumsing é mungdang gi, ahtum abyuq gíng nyi lhê."✧

✧ 1:25 Esai 40:6-8

gâ tô ri. Haû gi, nungmoq lé hko kyo bê mungdang nghut lhê.

2

¹ Haû mù luî, i-myt dû é hkyô banshoq eq mhaú zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkanmó pé lé tô pyám keq.

² Asik hku é zonú pé nau lé ô nau gadaú é su, woi-nyí eq sêng é jet é nau* lé ô nau gadaú nyí keq, haû jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê.

³ Hkâsu mù gâ le, haû Yhumsîng gi, gè sù nghut é lé, nungmoq chyam wú bekô nghut ri.

Rû Dui Nyi É Luqqok Eq Hkyin Yù Huí É Byù Myú

⁴ Byu pé mai hkyin htoq pyám kôlhang, Garai Gasâng é matú hpaudap luî, Yhâng èq hkyin yù huí é, rû dui nyi é Luqqok nghut sù, haû Yhumsing chyáng nungmoq jé lé é hkûn,

⁵ nungmoq le, rû dui nyi é luqqok pé su, woi-nyí eq sêng é yhûm† saí nyi é hui luî, Yesuq Hkris-duq dông mai, Garaí èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyû dut bekô nghut ri.

⁶ Hkâsu mù gâ le, Chyúmdang má,
"Wú keq, hkyin yù huí é eq hpaudap é htungchyûn
luqqok racham lé, Zi-un bùm má ngò lheq tô
é nghut lhê;

* **2:2** *Woi-nyí eq sêng é jet é nau* gâ é gi, Garai Gasâng é mungdang lé taí é nghut lhê. † **2:5** *Woi-nyí eq sêng é yhûm* gâ é gi, noqkuq hpúng lé taí nau é nghut lhê.

Yhang lé lumhkau é sê gi, hkâ-nhám le hoq hpû é hui râ a nghut."✠

ga taí tô ri.

⁷ Haû mù, lumjǐng bang nungmoq é matú gi, luq-gok haû hpaudap é nghut lhê. Nghut kôlhang, a lumjǐng bâng é matú gi,

"Haû yhûm saí bang hkyin htoq pyâm é luqgok gi, htungchyûn mâ é ahkyak dik é luqgok† dut bê nghut ri."✠

ga le,

⁸ "Byu pé lé, htûng leng râ luqgok eq myit leqbat nhâng râ luq mó cham dut bê nghut ri."✠

ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

⁹ Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yû huí é byuhú, hkohkâm hkyangjong amyû, chyoiyúng é byû myû, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byû ra-myû a nghut wú kôlhang, ahkuí gi, Garai Gasâng é byû myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

¹¹ Chyitdap é luzúm wuê ê, nungmoq é asak woi-nyí lé majan zân nyi é, yubak mara byíng jup é ô naù gadaú hkyô lé koi pyám keq nghû, gó ming byu

✠ 2:6 Esai 28:16 † 2:7 Ahkyak é luqgok gâ é gi, Hkrisduq lé taí é nghut lhê. ✠ 2:7 Hkya-on 118:22 ✠ 2:8 Esai 8:14

pé eq byùbíng pé dông mingkan htoq má nyi é bang nungmoq lé, ngò, wum taî tsuq kat lhê.

¹² Haû a lumj́ing shî é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kùm é buinyi má Garai lé shigyaú kó sháng gaq, a lumj́ing shî é byu pé é ahkaû má haû su ge é asak ùi hkyô dông nyi yap keq.

Uphkâng Bang Eq Yhumsîng Wui É A-ô Má Nyi Râ Hkyô

¹³ Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle,

¹⁴ shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng èq nhang tô é mauzaû pé é a-ô má nghut kôle, nyi nyi keq.

¹⁵ Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê.

¹⁶ Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchúng kó; Garai Gasâng é ùi-nhâng zoshâng wui dông nyi keq.

¹⁷ Yuq hkangmó lé rago za hkunggâ é hkyô shit keq; lumj́ing é gumang wui lé chyitdap keq; Garai Gasang lé gyuq hkunggâ nyi keq; hkoséng lé hkungga keq.

¹⁸ Dui-nhâng zoshâng wui ê, hkungga myit ban-shoq èq, nungmoq é yhumsîng wui é a-ô má nyi

keq; ge é eq nú-nhám bâng é a-ô má za a nghut, byuwuî pê é a-ô má le nyì keq.

¹⁹ Hkâsu mù gâ le, byù rayuq gi, Garai Gasang lé bûn nyì sù nghut é yanmai, mara dông a nghut kôlhang, wuîhke jamjau huî é hkyô lé hpuzô é lé, jân pyâm é nghut le gi, hkya-on gíng é sù nghut lê.

²⁰ Nghut kôlhang, nungmoq gi, mara kut shut é yanmai, nhuq bat é hkâm zo luî, haû lé jân nyi é nghut le gi, hai aróng wó kó râ lúh? Nghut kôlhang, nungmoq gi, ge é hkyô kut luî, wuîhke hui zô é lé jân pyâm é nghut jáng, haû gi, Garai Gasâng hí má hkya-on gíng é hkyô nghut lê.

²¹ Nungmoq gi, haû hkyo é matú ji yù huî é nghut lê; haî mù gâ le, Hkrisduq gi, nungmoq é matú wuîhke hkyô huî é má, nungmoq lé alik dông tô to byi bê nghut mù, nungmoq gi, Yhâng é hkyî-kám pé lé cháng râ dut lê.

²² "Yhang gi, hai mara le a kut shut, Yhâng é nhut mai mhaû é lé a myàng."[☆]

²³ Yhang gi, rhoi é huî é hkûn, yhangmoq lé a dum taû rhoi; wuîhke hkyô huî é hkûn, kyuq é dang a taí. Haû kut râ malaî, tengmán é dông jéyáng é Su chyáng, Yhânggùng lé ap pyâm ri.

²⁴ Nga-nhúng gi, yubak mara eq wó shi gang mù, dingmán hkyo é matú asak wó duî kó sháng gaq ga, Yhang gi, sik zîng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dâm pê é yanmai, nungmoq gi, lhoq gê byi é hui bekô nghut ri.

²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuî, nungmoq gi, haû

☆ 2:22 Esai 53:9

sau zúng Sû eq nungmoq é asak woi-nyí lé upzúng
Su chyáng lhing taû lò bekô nghut ri.

3

Ikun Myhî Pé Eq Ikun Hpô Pé

¹ Ikun myhî pé ê, haû eq rajung za, yhumsing é ikun hpó uphkang é a-ô má nyi keq; haû hkûn, yhangmoq mâ é rayuq yuq, haû mungdang lé a lumjúng kôlhing,

² yhumsing é asak duì hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhî é nyi yap é sâmlai dông mai yhang lé wó lhoq lhik yû râ nghut lhê.

³ Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut.

⁴ Hau é malaí, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoî é yúng hkyô nghut é nungmoq é i-myit unghkaû mâ é su é yúng hkyô sheq dut râ lhê.

⁵ Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuì gi, yhangmoq gùng lé haû dông mhôn yù yù kut kô é nghut lhê.

⁶ Sarah gi, Abraham é jìno gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkang é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haû eq rajung za, yhumsing é ikun myhí eq rahá nyi yap e ló é hkûn, sê gyo

byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlî wó é bang dông, yhangmoq lé hkungga keq. Haú hkûn, nungmoq é kyûdung dang lé a he-ngik pyám byi râ nghut lhê.

Ge É Kut Luî, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huî lhûm nyi keq; myit wú nô mù, gumang nhiktâng wuî su chyitdap lhûm nyi keq; shogyo nhikmyin myit bò luî, i-myit nyhum nyi keq.

⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haî mù gâ le, nungmoq gi, haú pê é matú, shimân jeju muî wó hkam yù kó sháng gaq ga, ji yu é hui kô é ru nghut lhê.

¹⁰ Hkâsu mù gâ le,

"Asak duî râ lé chyitdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuî lé, mhaú dang taî é mai, lhoq kâng pyám ra râ nghut lhê.

¹¹ Yhang gi, agè ashop hkyô mai lhing tau mù, ge é kut ra râ nghut lhê; yhang gi, nuingón simsaq hkyô lé hô mù, châng hkat nyi ra râ nghut lhê.

¹² Hkâsu mù gâ le, haú Yhumsing é myoqjí gi, dingmán bang lé wú nyi é nghut luî, yhangmoq é kyûdung dang lé, Yhâng é nohkyap eq gyo byi ri;

nghut kôlhang, haû Yhumsing é myoqdong gi, agè ashop hkyô kut bang lé gyè dông myang pyâm ri."☆

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhú?

¹⁴ Nghut kôlhang, dingmán hkyo é matú, nungmoq wuîhke jamjau huî le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dân kó."☆

¹⁵ Nungmoq kúm gi, myit nhikhum má, Hkrisduq lé, Yhumsing dông jowò byi keq. Nang wó é myit myoqbyù hkyô lé myi é sù yuq hkanmó lé, haî mù wó é hkyô tû taî kyo râ matú, ayang hen to aq. Nghut kôlhang, nú-nhâm é eq hkunggâ é dông haû lé kut nyi aq;

¹⁶ nungmoq é unghkaû myit san za dut nyi keq, haú hkûn, Hkrisduq dông mai nungmoq wó é ge é a-kyang lé rhoî dang taî é bang gi, yhangmoq lumù gansang é yanmai hoq hpû é hui kó râ nghut lê.

¹⁷ Garai Gasang ô nau é nghut le gi, agè ashop kut luî jamjau hkâm râ htoq má, ge é kut luî jamjau hkam le gi, je ge é nghut lê.

¹⁸ Hkâsu mù gâ le, nungmoq lé Garai Gasang chyáng shuî jé shoq, Hkrisduq gi, byu pê é yubak marâ é yanmai, radâm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byi é nghut lê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri.

19 Yhang gi, Woi-nyí dông, htóng lúng tô é woi-nyí pé lé ê hko kyô ri.

20 Woi-nyí haú pé gi, a-nham lé, Noaq é ipyat má wui-sanghpo lé Noaq tsuq nyi é hkûn Garai Gasang myit hîng hîng lánng nyi é u lé, jìno a gyô é bang nghut akô. Wui-sanghpo má wàng mù, wui mai hkyi yù huí é byù shau luí, shit yuq za nghut akô.

21 Wui haú gi, ahkuí nungmoq lé le hkyi yu é nghut é baptisma é azòng nghut ri; haú gi, gungdu mâ é agot a-û lé huí sêng pyám byí é a nghut é za, sansêng é unghkaú myit mai Garai Gasâng é hí má gidìq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô é nghut lhê.

22 Yesuq Hkrisduq gi, mauhkûng má doq ló luí, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanq é a-ô má nghut nyi bum akô.

4

Garai Gasâng É Matú Asak Dui Râ Hkyô

1 Haú mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâmlai hau eq yhumsing gùng má gyehking dông wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri.

2 Haú nghut é yanmai, yhang gi, yhang nyi tûm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê.

3 Hkâsu mù gâ le, nungmoq gi, lai lò bê ahkyíng má, a lumjínq shí é byu pé hkyin kut nau é hkyô

nghut é, shut é dông nyi zô lhúm nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye hai râ wut jung zoshuq lé yut yut ô nau é hkyô, achag achyut é hparà noq hkyô pé má, ahkyíng luq shoq nyi lai lò bê bang nghut akô.

⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri.

⁵ Nghut kôhang, yhangmoq gi, dui nyi é bang eq shî bê bang lé tarâ jéyang râ ri ri nghut to Sû lé jihpán shit kyo ra kó râ nghut lhê.

⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luí ga jang, yhangmoq gi, byù dông mai tarâ jéyang é hui râ eq, woi-nyí eq séng luí ga jang, Garai Gasang dông mai asak wó duí râ matú nghut lhê.

⁷ Lhunglhang htum râ ahkyíng gi, chyáng bê nghut ri. Haû mù luí, nungmoq kyú wó dung kó sháng gaq, bún gying luí, yhumsing gùng yhumsing hkan nyi keq.

⁸ Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haí mù gà le, chyitdap myit gi, yubak mara myo myo lé wó nghop pyâm é nghut lhê.

⁹ Rayuq eq rayuq, taí nyung nyâng é hkyô a bo é za, rago hkulum lhum keq.

¹⁰ Yuq hkanmó gi, yhumsing wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé,

lhumzui é eq rago chung jài râ lhê.

¹¹ Rayuq yuq taí é nghut jáng, Garai Gasâng é mungdang haù eq yhang rajung za taí ra râ nghut lhê. Garai Gasang gi, lunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô eq dojaú ra râ nghut lhê. Haù hpungwup shingkang eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huí É Hkyô

¹² Chyitdap é luzúm wuî ê, wuîhke hkyô dông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê dông, hkâgyuq dân kó.

¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkang eq rahá Yhang htoq shit é hkûn, nungmoq gi, gabú dik é hui kó râ nghut lhê.

¹⁴ Hkrisduq é myìng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gâ le, hpungwup shingkang bo é Woi-nyí ngu é, Garai Gasâng é Woi-nyí gi, nungmoq chyáng nyi nyi ri.

¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotû agè ashop kut sù, góbâng é mù má cháng gunjang sù dông jamjau huí é a dut sháng gaq.

¹⁶ Nghut kôlhang, Hkristan rayuq dông nungmoq jamjau huí é nghut le gi, hkâhoq nyi kó, Garai Gasang lé kúm gi, myìng hau é yanmai hkya-ôn nyi keq.

17 Hkâsu mù gê le, tarâ jéyáng râ ahkyíng gi, jé bê nghut luí, Garai Gasâng é ikun byu pé mai hí râ nghut lhê; haú gi, nga-nhúng mai hí é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê lú?

18 "Haú dingmán sù, hkyi yù hui râ wuí é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lú?"*

gâ tô ri.

19 Haú nghut mù luí, Garai Gasang ô nau é đông jamjau huí é bang gi, yhumsing gùng lé, lhumzuí é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wuí Éq Zorâm Wui

1 Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shing kang lé bo hkâm râ nghut sù đông mai sang kat kôlé:

2 Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang đông dojaú nyí keq; zúng rém é hkún, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê.

3 Nungmoq é loq má ap byí to bê bang lé a up zô é za, yhangmoq é hí má alik dut nyi keq.

* 4:18 Sângkhyang 11:31

* 5:2 Sau hpúng gâ é gi, lumjáng bang lé gâ lhê.

⁴ Haû jáng, Sau zúng Agyì mó† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó râ nghut lhê.

⁵ Zorâm wuì ê, nungmoq le, nungmoq htoq ipyat ko bâng é a-ô má nyì keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyì keq, hkâsu mù gâ le,
"Garai Gasang gi, nghutbûn é bang lé hkûm zing pyám kôlhâng, myit lhoq nyhum é bang lé jeju byì ri."☆

ga tô ri.

⁶ Haû mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsing myit lé yhumsîng lhoq nyhum nyì keq.

⁷ Nungmoq é myit chiq hkyô banshoq lé, Yhâng htoq má dú kê pyâm to keq, haì mù gâ le, Yhang gi, nungmoq é matú chiq byì nyì sù nghut lhê.

⁸ Yhumsing gùng lé yhumsîng hkâng mù, machya nyì keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, myíng wún é hkanghkyi su hkat gadaú jón wún ri.

⁹ Yhang lé htuq htîng pyám mù, lumjîng myit má gingtîng nyì keq, haì mù gâ le, mingkan gón mâ é nungmoq é gumang wuì le, rajung zâ é jamjau hkyô pé huì zô nyì kô é lé, nungmoq sê lhê.

¹⁰ Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é

† 5:4 Sau zúng Agyì mó gâ é gi, Hkrisduq lé gâ é nghut lhê. ☆ 5:5 Sânghkyang 3:34

hpungwup shingkâng matú nungmoq lé ji yù bê nghut luî, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luî, ging ging tít tít dut nhâng râ nghut lhê.

¹¹ Haû hpungwup a-tsam banshoq gi, Yhâng chyáng pyat dedu ahtum abyuq rû joq nyî sháng gaq. Amen.

Ló Htâng É Shi-kyâm Dang

¹² Lhumzuî é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gîng nyî keq.

¹³ Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri.

¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee